

# خطِ پولسِ بلده ایماندارای کولسی

## پیشگفتار

ای خطِ بلده جماعتِ ایماندارِ شارِ کولسی نوشته شده. کولسی دَ شرقِ افسُس دَ ترکیه امروزی موقعیت دشت. پولس خبر شُد که دَ مینکل جماعتِ ایماندارِ کولسی کسای جای گِرَفته که خود ره ایماندارِ مَوگه ولے نییه. امو کسا مَوگفت که بلده شَنختونِ خُدا و نجات پیدا کدو تنها ایمان دشتو دَ مسیح بس نییه، بلکه ارواح و قُدرت های روحانی ره ام باید پرستش کنی و احکامِ شریعت ره ام دَ جای بیری.

پولس قد امزی طرزِ فکرِ مُخالفتِ مونه و شخصیتِ مسیح ره بیان کده مَوگیه:

پولس دَ حالیکه ایماندارا ره امزی طرزِ فکرِ غَلَطِ باخبرِ مَوکنه، امچنان اونا ره تشویقِ مونه که زندگی خُو ره مطابقِ تعلیمِ عیسیٰ مسیح پیش بُره.

امی خطِ ره پولس دَ بندی خانه نوشته کده از دستِ تیخیکاس و

اونیسیموس د کولسی ربی کد .

## فهرستِ عنوانها

دُعا و سلام (فصل ۱ آیه ۱)

شکرگزاری و دُعا (۳:۱)

شخصیت و بزرگی مسیح (۱۵:۱)

زحمتهای پولس بلده جماعتِ ایماندارا (۲۴:۱)

آزادی ایماندارای مسیح از رسم-و-رواجای دنیایی (۶:۲)

اصول و مقرراتِ زندگی روحانی (۱:۳)

مقررات بلده رابطه خانوارِ مسیحی (۱۸:۳)

سلام های آخری (۷:۴)

## دُعا و سلام

۱) از طرفِ پولس که دَ خاست-و-اراده خُدا رسُولِ مسیحِ عیسیٰ آسته و از طرفِ برارِ مو تیموتائوس، ۲) بلده برارونِ مُقدَّس و وفادار که دَ مسیحِ تعلقِ دره و دَ شارِ کولسی آسته: فیض و سلامتی آته مو خُدا نصیب شُمو شنه.

## شُکرگزاری و دُعا

۳) مو همیشه وختیکه بلده شُمو دُعا مونی، خُدا ره که آته مولاى مو عیسیٰ مسیح آسته شُکر-و-سپاس مَوگی، ۴) چُون مو دَ باره ایمان شُمو دَ عیسیٰ مسیح و دَ باره مُحَبَّتِی که بلده تمامِ مُقدَّسینِ دَریدِ شَنِیدِ. ۵) ایمان و مُحَبَّتِ شُمو بخاطرِ اُمیدی آسته که دَ عالمِ باله بلده شُمو نِگاه شُده و شُمو از گاه دَ باره شی از کلامِ حَقِیقتِ یعنی از خوشخبری ۶) که دَز شُمو رسیده شَنِیدید. امو رقم که خوشخبری دَ تمامِ دُنیا ثمر دده رُشد مونه، امو رقم دَ مینکلِ از شُمو ام از روزی که او ره شَنِیدید و فیضِ خُدا ره دَ راستی پی بُریدید، ثمر دده رُشد مونه. ۷) شُمو او ره از ایپفراس یاد گِرفتید، از همکارِ عزیزِ مو و خِدمتگارِ وفادارِ عیسیٰ مسیح که از طرفِ

ازمو آسته. ⑧ او ام از مُحَبَّت شُمو که دَ وَسِيْلَه روح اَلْقُدْس بَخْشِيْدَه شُدِه، دَز مو خَبْر دَد.

⑨ امزی خاطر از روزی که مو ای ره شَنِیدِے، مو دَوامدار بَلدِه شُمو دُعا مُونی و از خُدا میخاهی که شُمو دَ وَسِيْلَه هر حِکْمَت و فامیدگی روحانی از شِنَاخْتِ خاست-و-اِرَادِه ازو لَبْرِیز شُنید ⑩ تا بَطَوْرِي رفتار کُنید که لایقِ مَولا آسته و او ره کاملاً خوشحال مُونه و تا دَ هر عملِ نیک پُرْتَمَر بَشید و دَ شِنَاخْتِ خُدا رُشد کُنید. ⑪ مو دُعا مُونی که قد تمام قُوْتی که از قُدْرَتِ پُرْجَلالِ ازو مییه، قوی شُنید تا صَبْر و تَحْمُلِ کَلو دَشْتَه بَشید و قد خوشی ⑫ از آتِه آسمانی شُکرگزاری کُنید که او شُمو ره لایقِ ازی دَنَسْت که دَ مِیراثِ مُقَدَّسِینِ دَ پادشاهی نُور شَرِیک شُنید. ⑬ او مو ره از چَنگِ قُدْرَتِ تَرِیکِ نِجاتِ دَد و دَ پادشاهی باچِه دوست-دَشْتَنی حُو اُورِد ⑭ که دَ وَسِيْلَه ازو مو بازخَرِید شُدی و بَخْشِشِ کُناهای مو مُهیا شُد.

## شَخْصِيَّتِ و بُزْرگی مَسِيح

⑮ مَسِيح چِهْرَه خُدايِ نَادِيْدَه يَه، اوْلَباری و بُزْرگْتَر از تمامِ مَخْلُوقات، ⑯ چراکه دَ وَسِيْلَه ازو تمامِ چِيزا دَ آسْمو و دَ زْمی خَلق شُد، چِيزای که دِيْدَه مُوشه و دِيْدَه نَمُوشه، چي تَخْتِ های پادشاهی، چي مَمْلَکْتا، چي حُکمرانا، چي قُدْرَتِ ها؛ اَرے، تمامِ چِيزا دَ وَسِيْلَه ازو و بَلدِه ازو خَلق شُد.

۱۷) مسیح پیش از پگ چیزا وجود دشت و د وسیله ازو پگ چیزا قد  
 یگدیگه خو وصل آسته. ۱۸) او سر جسم یعنی سر جماعت ایماندارا آسته؛  
 او ابتدا آسته، اولین کسی که از مرده‌ها دوباره زنده شد تا د تمام چیزا  
 پیش-قدم بشه. ۱۹) چون رضای خدا امی بود که تمام پوری خو ره د  
 مسیح جای-د-جای کنه ۲۰) و د وسیله ازو تمام چیزا ره قد خو آشتی بدیه،  
 چی د آسمو، چی د زمی. آره، او د وسیله ریختندون خون ازو د روی  
 صلیب، صلح-و-سلامتی ره د وجود آورد.

۲۱) شمو یگ وخت د فکرای خو د خدا بیگنه و دشمنون شی بودید،  
 مشغول د اعمال شیرانه، ۲۲) مگم آلی خدا د وسیله جسم بشری مسیح از  
 طریق مرگ ازو شمو ره قد خو آشتی دده تا شمو ره مقدس و بے عیب و  
 بدون ملامتی د حضور خو بیره، ۲۳) د شرطی که د ایمان خو قایم و  
 استوار منده ادامه بدید و از آمیدی که د خوشخبری آسته و شمو او ره  
 شنیدید، دور نشنید. ای امو خوشخبری آسته که بلده تمام مخلوقات د زیر  
 آسمو اعلان شده و ما پولس، خدمتگار شی شدیم.

## زحمتای پولس بلده جماعت ایماندارا

۲۴) آلی ما از زحمتای که بخاطر از شمو میکشم، خوشحال استم و هر  
 کمبود رنج های مسیح ره د جسم خو تکمیل مونم، بخاطر جسم ازو یعنی

بخاطرِ جماعتِ ایماندارا. ٢٥) ما دَ مُطَابِقِ وَظِيْفِهِ كِه خُدا بِخاطِرِ از شُمو دَ  
 عُهْدِه مه ايشت، خِدْمَتگارِ جماعتِ ایماندارا شُدْم تا کلامِ خُدا ره بطُورِ  
 کَامِلِ اِعلانِ کُنْم، ٢٦) يعنی اُمُو راز ره که از زمانِ ها و نسلِها تاشه  
 مَنْدُد، مگم آلی بِلْدِه مُقَدَّسِين شِي بَرَمَلا شُدِه. ٢٧) خُدا خاست که بِلْدِه ازوا  
 معلُومدار کُنه که دَوْلَتْمَندي پُرْجَلالِ امزی راز دَ مینکل مردُمایِ غَیرِ یهُود  
 چِيقس بُزُرگ آسته، يعنی ای که مَسِيح دَ زِنْدَگی شُمو آسته، یگ اُمیدِ  
 پُرْجَلال. ٢٨) و مو پِیغامِ مَسِيح ره اِعلانِ مُونی و هر کس ره نَصِيحَتِ کده  
 قد تمامِ حِکْمَت-و-داناییِ تَعْلِيمِ مِیدی تا هر کس ره دَ اِيمانِ شِي دَ مَسِيح  
 بِالغِ کده دَ خُدا تَقْدِيمِ کُنِي. ٢٩) بِلْدِه امزی مقصد ما زَحْمَتِ مِیکشُم و  
 مُطَابِقِ قُوتِ ازُو که قَدْرَتْمَنْدانِه دَ و جُود مه کارِ مُونِه، تَپ-و-تَلالِش مُونُم.

٢ ١) ما مِیخایْم شُمو بَدَنید که ما چِيقس بِلْدِه از شُمو و بِلْدِه  
 ایماندارایِ شارِ لائودیکیه و تمامِ کسایِ دِیگِه که تا هنوز مَرِه رُوی دَ رُوی  
 نَدیده، زَحْمَتِ مِیکشُم ٢) تا دِلِ هایِ پگ تشویقِ شُنه و پگ دَ مَحَبَتِ  
 اِتْحاد-و-اِتْفاقِ دَشْتِه بَشِه و تا قد اِطْمِینانِ کَامِلِ از تمامِ دَوْلَتْمَندي فامیدگی  
 بَرخوردار شُدِه شِناخْتِ رازِ خُدا يعنی مَسِيح ره حاصِلِ کُنه، ٣) که تمامِ  
 خزانِه هایِ حِکْمَتِ و عِلْمِ دَ مَسِيح تاشه آسته. ٤) ما ای ره مُوگم تا هیچ  
 کس شُمو ره قد تورایِ نَرْم-و-چَرِبِ خُو بازی نَدیه. ٥) چُون اِگرچِه جِسمًا  
 ما از شُمو دُور اَسْتُم، ولے دَ رُوحِ قد شُمو اَسْتُم و از دِیدونِ نَظْم-و-تَرْتِيبِ و  
 مُسْتَحکَمِ بُوْدونِ اِيمانِ شُمو دَ مَسِيحِ خُوشحالِ اَسْتُم.

# آزادی ایماندارای مسیح از رسم-و-رواج های دنیایی

⑥ پس اُمُو رقم که مسیح عیسیٰ ره بحیثِ مَولای خُو قَبُول کدید،  
اُمُو رقم دَ مُطابِقِ راهِ ازُو رفتار کُنید، ⑦ و دَزُو ریشه دَوَندِه آباد شُنید؛ و  
اُمُو رقم که تعلیمِ گِرَفْتِید دَ ایمان خُو اُستوار شُدِه از حد کَلو شُکرگزاری  
کُنید. ⑧ احتیاط کُنید که کس شُمو ره قد فَلَلسَفِه پُوج و گمراه کُننده که  
مُطابِقِ رسم-و-رواج های انسان و مُطابِقِ اُصولِ اِبْتِدایی ازی دُنیا اُسته اسیر  
نَکنه، چراکه ای چیزا مُطابِقِ تعلیمِ مسیح نییه. ⑨ چُون تمام پُوری اِلهی  
جِسماً دَزُو جای گِرَفْتِه ⑩ و شُمو ام که دَزُو تعلق دَرید تکمیل شُدید. و اُو  
سر هر حُکومت و هر قُدرت اُسته. ⑪ و امچنان، شُمو دَ عِنوان  
ایماندارای ازُو خَتنه شُدید، خَتنه که دَ وَسِیلَه دِسْتِ انسان انجام نَشُد،  
بَلکه قد بُر کدونِ طَبِيعَتِ نَفْسانی دَ وَسِیلَه خَتنه انجام شُد که دَ مسیح  
تعلق دَره. ⑫ شُمو دَ وَسِیلَه غُسلِ تَعْمِیدِ قد مسیح دَفن شُدِه دَ وَسِیلَه  
ایمان دَ قُدرتِ خُدا که مسیح ره از مُرده ها دُوباره زنده کد، قد ازُو دُوباره  
زنده ام شُدید. ⑬ و خَتیکه شُمو دَ خَطاها و ناخَتنگی طَبِيعَتِ نَفْسانی خُو  
مُرده بُودید، خُدا شُمو ره قد ازُو زنده کد، چُون اُو تمام خَطاها مو ره  
بخشید ⑭ و نَوشْتِه ره که قد حُکمِ قانُونی دَ ضِدِ اَزمو بُود، باطل کد و اُو  
ره دَ صَلیب میخکوب کده از بَین بُرد. ⑮ اُو حُکمرانا و قُدرت ها ره خلع

سَلَّاحِ كَدِّ وَاُونَا رَه بَرَمَلَا رَسُوا كَدِّ، چُون اُو دَ بَلَه اَزُوا دَ رُوِي صَلِيْبِ پِيْرُوَز  
شُد.

١٦) امزی خاطر نِيلِيْدِ كِه هِيْچِ كَسِ بَخَاطِرِ خُوْرْدَنِي يَا وُچِي كَدَنِي يَا  
عِيْدَهَا يَا مَاهِ نُو يَا رُوْزِ اَرَامِ شُمُو رَه مَحْكُوْمِ كُنَه. ١٧) اميا تَنَهَا سَايَه  
چِيْزَايِ اَمْدَنِي اَسْتَه، لِيْكَنِ اَصْلِ دَ مَسِيْحِ تَعْلُقِ دَرَه. ١٨) نِيلِيْدِ كِه هِيْچِ كَسِ  
شُمُو رَه اَزِ اَجْرِ بِيْ نَصِيْبِ كُنَه، يِعْنِي كَسَايِ كِه دَ خَارِ كَدُوْنِ جِسْمِ وِ عِبَادَتِ  
مَلَايِكَه هَا تَاكِيدِ مُونَه وِ غَرَقِ رُوِيَا هَايِ اَسْتَه كِه دِيْدَه وِ دَ وِسِيْلَه فِكْرِ  
اِنْسَانِي خُو بِيْ جَايِ مَغْرُوْرِ شُدَه. ١٩) امي كَسَا دَ سَرِ يِعْنِي دَ مَسِيْحِ،  
چَسْپِيْدَه نَبِيَه، دَ حَالِي كِه اَزِ سَرِ تَمَامِ جِسْمِ قُوْتِ مِيْگِيْرَه وِ دَ وِسِيْلَه مَفْصَلِ  
هَا وِ بَنْدَهَا قَدِ يِگْدِيْگِه خُو يِگْجَايِ نِگَاهِ مُوْشَه وِ قَدِ رُشْدِي كِه اَزِ طَرْفِ  
خُدا اَسْتَه، رُشْدِ مُوْكُنَه.

٢٠) پَس اِگِه شُمُو وَاِقْعَا قَدِ مَسِيْحِ نَسَبَتِ دَ اَصُوْلِ اِبْتِدَايِي اَزِي دُنْيَا  
مُرْدِيْدِ، چِرَا رَقْمِي زَنْدَگِي مُوْنِيْدِ كِه بُوْگِي هَنُوْزِ دَ دُنْيَا تَعْلُقِ دَرِيْدِ وِ تَابِعِ  
مُقَرَّرَاتِي مُوْشِيْدِ كِه مُوْگِيَه: ٢١) ”اِي رَه دِسْتِ نَزُو! اُو رَه مَزَه نَكُو! اُو رَه  
غَرَضِ نَكِيْر!“ ٢٢) تَمَامِ امزِي چِيْزَا رَه كِه اِسْتِفَادَه كُنِي اَزِ بَيْنِ مَوْرَه؛ اميا  
مُطَابِقِ اِحْكَامِ وِ تَعْلِيْمِ هَايِ اِنْسَانِي اَسْتَه. ٢٣) اِگْرِچِه امي چِيْزَا بَخَاطِرِ  
عِبَادَتِ دَاوْطَلْبَانَه، فَرُوْتَنِي ظَاهِرِي وِ تَبِنْدُوْنِ جِسْمِ يِگِ ظَاهِرِ عَاقِلَانَه دَرَه،  
مِگْمِ بَلْدَه اِدَارَه كَدُوْنِ خَاهِيْشَاتِ نَفْسَانِي هِيْچِ فَايْدَه نَدَرَه.

## اصول و مقررات زندگی روحانی

- ۳ ① پس بخاطری که شمو قد مسیح دوباره زنده شدید، د طلب چیزای بشید که د عالم باله یه، د جایی که مسیح د دست راست خدا شسته. ② د باره چیزای که د عالم باله آسته فکر کنید، نه د باره چیزای که د روی زمی آسته. ③ چون شمو مُردید و زندگی شمو قد مسیح د سایه خدا تاشه یه. ④ وختی مسیح که زندگی مو آسته ظهور مونه، اوخته شمو ام قد ازو د بزرگی-و-جلال ظهور مونید.
- ⑤ امزی خاطر، هر چیزی که د وجود شمو دنیایی آسته، او ره نابود کنید: زنا، ناپاکی، هوی-و-هوس، خواهشات شیرانه و حرص ره که بت پرستی آسته. ⑥ بخاطر امزی چیزا قار-و-غضب خدا د بله مردمای نافرمان نازل موشه. ⑦ شمو ام یگ زمان د امزی راه ها قدم میزدید، وختیکه د مطابق ازوا رفتار موکدید. ⑧ لیکن آلی پگ امزی چیزا ره ایله بدید، یعنی قار، غضب، کینه و تهمت زدو ره؛ و امچنان تورای زشت ره از دان خو دور کنید. ⑨ د یگدیگه خو دروغ نکید، چراکه شمو طبیعت کهنه ره قد اعمال شی قتی از خود دور کدید ⑩ و خود ره قد طبیعت نو پوشندید که د شناخت تازه شده موره، تا همرنگ خالق خو شنه. ⑪ د امزی طبیعت نو د بین یونانی و یهودی، ختنه-شده و ناختنه، بربری و

سکیتی و دَ بَینِ غُلام و آزاد فرق نییه، بلکه مسیح تمام چیز آسته و دَ پگ وجود دَره.

۱۲) پس رقمِ اِنْتِخاب شده های مُقَدَّس و دوست-دَشْتَنی خدا خودون ره قد دِلْسوزی، مِهْربانی، فروتنی، مُلایمت و صبر-و-حَوَصِلَه بُپوشَنید. ۱۳) یگدیگه خُو ره تَحْمَل کُنید و اگه کُدم شُمو از دیگه خُو گله دَشْتَه بَشید، یگدیگه خُو ره بُبخشید. امو رقم که مولا شُمو ره ببخشید، امو رقم شُمو ام یگدیگه خُو ره بُبخشید. ۱۴) دَ بِلَه پگِ امزیا مَحَبَت ره بُپوشید که تکمیل کُننده تمام چیزا آسته. ۱۵) بیلید که آرامشِ مسیح دَ دل های شُمو حُکمرانی کُنه، چراکه شُمو بلده امزی مقصد دَ یگ جسم کوی شُدید؛ و شُکرگزار بَشید. ۱۶) بیلید که کلامِ مسیح قد اَرزِشِ بے اندازه خُو دَ وجود شُمو جای بَگیره؛ یگدیگه خُو ره قد حِکْمَتِ کَامِلِ تَعْلیمِ بَدید و نَصیحَت کُنید. قد زُبور خاندو، حمد-و-ثنا و سُرود های روحانی دَ وسیله فیضی که دَ دل های شُمو آسته، خدا ره ستایش کُنید. ۱۷) و هر چیزی ره که انجام میدید، چی دَ گفتار، چی دَ کردار، تمام شی ره دَ نامِ مولا عیسی انجام بَدید و دَ وسیله ازو خدا یعنی آته آسمانی ره شُکر-و-سپاس بُگید.

## مُقَرَّراتِ بَلَدَه رَابِطَه خَانَوَارِ مَسِیحی

۱۸) آی خاتونو، تابع شویون خُو بَشید، امو رقم که دَ نظرِ مولا مُناسِب

آسته. ١٩) آى شوى ها، خاتونوى خو ره مُحَبَّت كُنيد و قد ازوا اوقات  
تلخى نكُنيد. ٢٠) آى بچكيچا، از آته-و-آبه خو د هر كار اطاعت كُنيد،  
چراکه اى كار مَورِدِ پَسَنَدِ مَولا آسته. ٢١) آى آته-گو، بچكيچاى خو ره سر  
قار نكُنيد، نَشْنَه كه اونا دِل-مَيده شنه.

٢٢) آى غلاما، از باداراي جِسْمانى خو د هر كار اطاعت كُنيد، نه تنها  
وختيکه زير نظر آستيد رقمِ كساي كه رضايَتِ انسان ره طلب مونه، بلكه  
از تى دِلِ اطاعت كُنيد و از مَولا بَتَرَسِيد. ٢٣) هر كاري ره كه انجام ميديد  
از دِل-و-جان انجام بديد رقمي كه بگي بلده مَولا كار مُونيد، نه بلده  
انسان. ٢٤) چُون شُمو ميديد كه از مَولا يگ ميراث دَ عِنوانِ اَجْر دَ دست  
ميريد، چراکه شُمو مَولا مسيح ره خِدْمَت مُونيد. ٢٥) هر كس كه بد كنه،  
سَزاي بدي ره كه كده مينگره و دَ پيشِ خُدا طرفداري و جُود ندره.

٢٤) ١) آى بادارا، قد غلاماي خو عادِلانه و دَ اِنصاف رفتار كُنيد،  
چُون شُمو ميديد كه شُمو ام دَ عالمِ باله يگ بادار دَرِيد.

٢) دَ دُعا پايبند بشيد و مُتَوَجِه بشيد كه قد شُكرگُزاري قتي بشه. ٣)  
و دَ عَيْنِ وخت بلده ازمو ام دُعا كُنيد كه خُدا يگ درگه ره بلده رَسَنَدون  
كلام واز كنه تا مو بَتَنِي رازِ مسيح ره اِعلان كُني كه ما بخاطر شي بَندي  
آسْتَم. ٤) دُعا كُنيد كه ما امي راز ره بَطُورِ واضِح بَرَمَلا كُنم، اُمو رقم كه

بلده مه فرض آسته. ⑤ د برابر کسای که از بُرو آسته عاقلانه رفتار کده  
امزو فرصت خُوب اِستفاده کُنید. ⑥ کُفتگوی شُمو همیشه پُرفیض و  
سَنجیده بَشه تا بَدنید که د هر کس چی رقم جواب بَدید.

## سلام های آخِری

⑦ تیخیکاس شُمو ره از تمام احوال مه باخبر مونه. او برارِ عزیز،  
خِدمتگارِ وفادار و همکار مه د خِدمتِ مولا آسته. ⑧ ما او ره بلده امزی  
مقصد د پیش شُمو رِبی مُونم که شُمو از احوال مو باخبر شُنید و تا او شُمو  
ره دل-جمی بَدیه. ⑨ او ره قد اونیسیمس، برارِ وفادار و دوست-دشتنی  
مو که یکی از شُمو آسته، قتی رِبی مُونم. اونا د باره تمام چیزای که د  
اینجی رُخ میدیه بلده شُمو مَوگیه.

⑩ اِستَرخُس که قد از مه یگجای بندی آسته و مَرَقَس باچه کاکای  
برنابا شُمو ره سلام مَوگیه. د باره مَرَقَس بلده شُمو هِدایت دده بُوَدَم که هر  
وخت او د پیش شُمو اَمَد از شی پذیرایی کُنید. ⑪ و یسوع که د نام  
یوستس یاد موشه، ام شُمو ره سلام مَوگیه. تنها اینمیا از جم یهودیا د  
مینکل همکارای مه آسته که بلده پادشاهی خُدا کار مونه و اَمیا باعِث  
آرامش مه شُده. ⑫ ایپفراس که یکی از شُمو و خِدمتگارِ مسیح عیسی  
آسته، شُمو ره سلام مَوگیه. او همیشه د دُعاهای خُو بلده شُمو جدی دُعا

مونه تا د ایمان بالغ شنید و د پی بردون تمام خاست-و-اراده خدا کاملاً  
مُتَقِن شید. ۱۳ ما د باره ازو شاهدی میدیم که او بخاطر از شمو و  
ایماندارای لائودیکیه و هیراپولیس غدر زحمت میکشه. ۱۴ لوقا طیب  
دوست-دشتنی و دیماس شمو ره سلام موگیه.

۱۵ بلده پرارونی که د لائودیکیه آسته و بلده خوار مو نیمفا و جماعت  
ایماندارا که د خانه شی آسته، سلام های مره برسید. ۱۶ وختیکه ای  
خط بلده شمو خنده شد، توخ کُنید که بلده جماعت ایماندارای لائودیکیه  
ام خنده شنه و شمو ام خطی ره که بلده لائودیکیه نوشته شده بخانید. ۱۷  
د آرخیپس بگید: ”توخ کو، خدمتی که د راه مولا دز تو دده شده، او ره  
تکمیل کنی.“

۱۸ ما پولس، امی دُعا-و-سلام ره قد دست خود خو نوشته کدیم. د  
یاد دشته بشید که ما بندی آستم. فیض نصیب شمو شنه. [آمین.]